

白石道人自叙

詩本無體三百篇皆天籟自鳴下逮黃初迄於今  
人異蘊故所出亦異或者弗省遂艷其各有辭也  
近過梁溪見尤延之先生問余詩自誰氏余對以  
異時泛閱衆作已而病其駁如也三薰三沐師黃  
太史氏居數年一語噤不敢吐始大悟學即病願  
不若無所學之為得雖黃詩亦偃然高閣矣先生  
因為余言近世人士喜宗江西溫潤有如范至能  
者乎痛快有如楊廷秀者乎高古如蕭東夫俊逸



如陸務觀是皆自出機軸曾有可觀者又奚以江  
西為余曰誠齋之說改爾昔聞其歷教作者亦無  
出諸公右特不肯自屈一指耳雖然諸公之作殆  
方圓曲直之不相似則其所許可亦可知矣余識  
千巖於瀟湘之上東來識誠齋石湖嘗試論諸事  
而諸公咸謂其與我合也豈見其合者而遺其不  
合者耶抑不合乃可以為合耶抑亦欲俎豆余於  
作者之間而姑謂其合耶不然何其合者衆也余  
又自喈曰余之詩余之詩耳窮居而野處用是陶  
寫寂則可必欲其步武作者以鈞能詩聲不惟不  
可亦不敢

自叙二

作者求與古人合不若求與古人異求與古人異  
不若求與古人合而不能不合不求與古人異而  
不能不異彼惟有見乎詩也故向也求與古人合  
今也求與古人異及其無見乎詩已故不求與古  
人合而不能不合不求與古人異而不能不異其  
求如風其止如雨如印：泥如水在器其蘇子所  
謂不能不為者乎余之詩蓋未能進乎此也未進  
乎此則不當自附于作者之列悉取舊作秉畀炎



火俟其庶幾於不能不為而後錄之或曰不可物  
以蛻而化不以蛻而累以其有蛻是以有化君於  
詩將化矣其可以舊作自為累乎始存之以俟他  
日

白石詩集目錄

卷之一

五言古詩

卷之二

七言古詩

卷之三

五言律詩

卷之四

七言律詩

卷之五

五言絕句

七言絕句

六言絕句



國家圖書館, NATIONAL CENTRAL LIBRARY, TAIWAN, R.O.C.



白石詩集卷之一

五言古詩

奉別沔鄂親友

以長歌意無極好  
為老夫聽為韻

滔滔沔鄂留有忝三宿  
桑持盃了白日事賤九  
蜨  
蜨舍當去石友烟席凌  
江湘為君試歌商歌短  
意則長

佳人魯山下

謂楊大昌正之

日弄清漢波促絃調寶瑟哀  
思感人多咬哇秦缶擊冷落  
郢客歌知音良不易

國家圖書館 NATIONAL CENTRAL LIBRARY, TAIWAN, R.O.C.

宋番陽姜夔堯章著

如此粲者何

英英白龍孫鄭仁舉次舉眉目古人氣拮据營數掾下

簾草生砌文章作逕庭功用見造次無庸垂罄嗟

遺安鹿門意

詩人辛國士辛泌克清句法似阿駒別墅滄浪曲綠陰

禽鳥呼頗參金粟眼漸造文字無兒輩例學語屋

壁祝一本蒲廬作呼

山陰千載人揮灑照八極只今定武刻猶帶龍虎

筆單侯出機杼單名炳文豈是劍舞得餘波入竹石絕

歎咄咄逼

異時之呆君在涅守白顛黃鐘欠牛鐸淋漓弔遺

稿有子殊可人蔡迨堅吾子字武伯特未見此老客來請論

文但道曲肱好

中郎遊千霜曲高復誰為龐翁趣無絃鄭伯功斲

鼻春風桃花溪寒淥繞蒼翠何當從兩君放浪計

幽事

宦達羞故妻貧賤厭丘嫂上書雲雨迴還舍筍蕨

老江臯鋤帶經法計恨不早士無五羖皮沒世抱

枯槁

伐木响虚牝吾願友褐夫九閔呀虎豹何時内高  
祛黃鵠渺雲樹鸚鵡澹烟蕪倚杖得清賞洗心觀  
本初

孤鴻度関山風霜催翎翎影低白雲暮哀噉那忍  
聽士生有如此儲粟不滿瓶著書窮愁濱可續離  
騷經

赤松圖

山東隆準公未語心已解按劍堂下人成事汝應  
退非無帶礪約政爾有恩害平生三寸舌松間漱  
寒瀨

雪中訪石湖

雪斫如玉城偏師敢輕犯黃蘆陣野鷺我自將十  
萬三載渠未降北面石湖范先生伯越手定目一  
笑粲

虞美人草

夜闌浩歌起玉帳生悲風江東可千里棄妾蓬蒿  
中化石那解語作草猶可舞陌上望騅來翻愁不



相顧

華藏寺雲海亭望具區

寺為張循王功德院

茫茫復茫茫中有山蒼蒼大哉夫差國坐占天一  
方夫差醉蓮宮巨浪搖不醒越師何從來奪我玉  
萬頃年年亭上秋一笛千古愁誰能知許一本作幾事  
飛下雙白鷗

夏日寄朴翁朴翁時在靈隱

風吹松樹枝懷我松間支雲從北山來令我屢回  
首山雲夜夜起山雨侵入衣遙知竹窻裏自吟新

雨詩

春日書懷

九真何蒼蒼乃在清漢尾衡茆依草禾念遠獨伯  
姊春來衆芳滋春去衆芳萎兄弟各天涯啼鴉見  
料理漢江出巨魚風雷入驅使安得挾我翰西征  
二千里

春雲驛路暗遊子眇歸程永懷故山下風雨悲松  
庭翁仲不解語幽鳥時時鳴人家插垂柳客裏又  
清明

垂楊大別寺春草郎官湖家巷有石支合并不待  
呼瘦藤倚花樹花片藉玉壺老鄭談絕妙辛揚句  
敷腴平生子姚子貌古心甚儒時邀野僧語問與  
琴工俱酒闌興未了左轉城南隅大江圍楚碧烟  
水入元虛留落不自恨惟嗟故人疎一月三見夢  
夢中相與娛日日潮風起悵望武昌魚武昌十萬  
家落日紫烟低亭亭頭陀塔高處白鳥棲白鳥忽  
飛去春山空四圍南樓有佳人再召且再辭閉門  
課文史櫻物深天機斯人不可致白鳥會來歸

箜篌引

箜篌且勿彈老大不可聽河邊風浪起亦作箜篌  
聲古人抱恨死今人抱恨生南鄰賣妻者秋夜難  
為情長安買歌舞半是良家婦主人雖愛憐賤妾  
那久住緣貧來賣身不緣觸夫怒日日登高樓悵  
望宮南樹

賦千岩曲水

紅雨灑溪流下瀨仍小駐魚隊獵殘香故故作吞  
吐老子把一盞微風忽吹去

李陵臺

李陵歸不得高築望鄉臺  
長安一萬里鴻鴈隔年  
回望望雖不見時時一上來

待千岩

褰裳望洞庭眼過天一角  
初別未甚愁別久今始  
覺作箋非無筆寒鴈不肯落  
蘆花待拏舟怪底北  
風惡

若人金石心試問洞庭浪  
傳聞下巴陵瀝酒喜無  
恙我行丹楓林屢騁白蘋  
望烏鵲不可嗔論功當

坐上

呈徐通仲兼簡仲錫通仲與誠齋為鄉人  
近來赴調而誠齋去國又通仲久與千岩  
有茗雪之約而未至余挽通仲欲與同歸  
千岩故末章及之

斯文準乾坤作者難屈指  
我從李郭遊知有徐孺  
子春風橘洲前白月太湖尾  
懷哉一作來無期玉  
唾炯在紙去年識仲氏何啻空谷喜  
合并忽自天  
顛倒見底裏維君天下士  
竹箭東南美胡不在石

渠諸公當料理千岩今林宗泉石助風軌示病作  
疾不下堂有句高八米此老筆硯交誠齋古元禮  
毫端洒秋露去國詞愈偉屬聞都門別回首即桑  
梓獨憐茗溪上垂榻俟行李烟波肯尋盟歸權為  
君艤

和轉菴丹桂韻

野人復何知自謂山澤好來禪奉常議識笳鼓羽  
葆誰憐老垂垂却入鬧浩浩營巢猶是寓學圃何  
不早淮桂手所植漢甕躬自抱花開不忍出花落

不忍掃佳客夜深來清尊月中倒一禪兩居士更  
約踐幽討

昔遊詩

夔蚤歲孤貧再走川陸數年以來始獲寧處  
秋日無謂追述舊遊可喜可愕者吟為五字  
古句時欲展開自省生平不足以為詩也

洞庭八百里玉盤盛水銀長虹忽照影大哉五色  
輪我舟度其中晃晃驚我神朝發黃陵祠暮至赤  
沙曲借問此何處滄灣三十六青蘆望不盡明月

耿如燭灣灣無人家只就蘆邊宿

放舟龍陽縣洞庭包五湖

禮沅濱  
湘大江

洶洶不得道茫

茫將奈何篙師請小泊石矸沉泥沙是中無岸

強指葦與莎滯留三四晨大浪山嵯峨同舟總下

淚自謂餵黿鼉白水日以長僅存青草芽轉盼又

巴陵但見千頃波此時羨白鳥飛入青山阿

九山如馬首一一奔洞庭小舟過其下幸哉波浪

平大風忽怒起我舟如葉輕或升千丈波或落千

丈坑回望九馬山政與大浪爭如飛鵝車礮亂打

睢陽城又如白獅子山下跽猙獰湏臾入別浦萬

死得一生始知茵席濕盡覆杯中羹

蕭：湘陰縣寂：黃陵祠喬木蔭樓殿畫壁半傾

欹蘆洲雨中淡漁網烟外歸重華不可見但見江

鷗飛假令無恨事過此亦依：

我乘五板船將入沌河口大江風浪起夜黑不見

手同行子周子渠胆大如斗長竿插蘆席船作野

馬走不知何所詣生死付之偶忽聞入草叢燈火

亦稍有找船遂登岬亟買野家酒

天寒白馬渡落日山陽村是時無霜雪萬里風奔  
奔外旃吹已透內纜冰不溫吹馬：欲倒吹笠任  
飛翻不見行路人但見草木蕃忽看野燒起大燄  
燒乾坤殼如震雷電勢若江湖吞虎豹走散亂麋  
鹿不足言夜投野店宿無壁亦無門此行值三危  
幸得軀命存明發見老姊斗酒為招魂

揚舲下大江日日風雨雪留滯鰲背洲十日不得  
發岸冰一尺厚刀劍觸舟楫岸雪一丈深屹如玉  
成堞同舟二三士頗壯不恐懾蒙瓊間蓬卧波裡  
任傾側晨興視瓊上積雪何皎潔欲上不得梯欲  
留岸頻裂板援始得上幸有人見接荒村兩三家  
寒苦衣食缺買猪祭波神入市路已絕如今得安  
坐閑對妻兒說

青草長沙境洞達渺相連洞達西北角雲邊更無  
邊後有白河沌渺澗里數千豈惟大盜窟神龍所  
盤桓白湖辛已歲忽墮死蜿蜒一鱗大如箕一髯  
大如椽白身青鬚鬣兩角上梢天半體卧沙上半  
體由沈淞里正崗之官：使吏致虔作齋為襦袂

觀者足闕、歛席覆其體數里聞腥膻一夕雷雨  
過此物忽已遷遺跡陷成川中可行大船是年虜  
亮至送死江之壩或云祖龍讖詭異非偶然近日  
山陽人採菱不知還望見三龍浮目若電火燃見  
龍多見尾少見四體全一龍已為異三者已罕傳  
又因漁湖側水中忽生烟、中一驢出繞身步蹠  
遷俄隨霹靂去欲語無由緣我聞語此事乘舟往  
觀馬徑往招葭浦白鷺爭相先湖有劉備廟宴司  
浩渺權徘徊無所見歸懼月明前

昔游洞源山先次白馬渡、頭何清深鳴鶴在高  
樹白馬亦洞天昔人有奇過洞門不可見但聞水  
聲怒瞻彼羽人宅乃乘方船渡修廊夾五殿重閣  
映千樹規模象魏壯四合綠陰護山椒望五溪壺  
頭入指頽故宮在其北屋瓦帶松霧古衫晉時物  
中空野人住外圍四十尺內可十客聚我遊瞿仙  
館壇上表遺步却下八疊坡一亭衆妙具四山抱  
澄潭老木枝幹互瞻前秀而迴坐久凜難駐桃源  
獨不見僻在宮南路山行轉深遠狙猿吟上下石

竇出微涓令我意猶豫昔聞漁舟子水際見洞戶  
今看去溪遠定是後人誤惆悵却歸來此遊不得  
屢於今二十年歷：經行處

昔遊衡山下看水入朱陵半空掃積雪萬：玉花  
凝或如生綃挂或作薄霧橫紛：虎豹吼往：蛟  
龍驚人語不相聞濺電漂風纓有魚緣峭壁上上  
終不停此中有神物雷雨周八紘

昔遊衡上山未曉入出谷欲識所坐輿橫板挂兩  
竹狀如秋千垂高下不傾覆登山九千丈中道多

佛屋一峯高一峰一峯秀林木仰看同來客木末  
見冠服高臺石橋路尋常雲所宿下方雷雨時此  
上自晴旭紫蓋何突兀萬里在一目餘峰六七十  
僅如翠浪轟北有嬾瓚巖大石庇樵牧下窺半厓  
花杯盃琢紅玉飛雲身畔遇攬之不盈掬祝融最  
高絕紫蓋不足錄俯視同仰觀蒼蒼萬形伏惟餘  
岫嶸峰南睇半空綠髻鬚認瀟湘向岳流屈曲高  
處驚我魂翻思宅平陸其東有雷穴靈異謹勿觸  
雲來綿世界雲去一峰獨僧牕或留罇雲入不可



逐絕頂橫石渠仙人有遺躅山多金光草夜半如  
列燭靈藥不可尋吁嗟歸太速

濠梁四無山坡陔亘長野吾披紫茸羶縱飲面無  
赭自矜意氣豪敢騎雪中馬行行逆風去初亦略  
霑灑疾風吹大片忽若亂飄瓦側身當其衝絲鞵  
袖中把重圍萬箭急馳突更叱咤酒力不支吾數  
里進一竿燎茅烘濕衣客有見留者徘徊望神州  
沈歎英雄寡

既離湖口縣未至落星灣舟中兩三程程見廬  
山廬山遮半天五老雲為冠朝看金疊疊暮看紫  
巉巉瀑布在山半髣髴認一斑廬山忽不見雲雨  
滿人間

雪霽下揚子閒望江上山上山如白玉日照金孱  
顏是時江水淨影落清鏡寒潮催庾信老雲送佛  
狸還萬古感心事惆悵垂楊灣

衡山為真宮道士飲我酒共生有何人山中白衣  
叟問叟家何在近住山洞口殷勤起見邀徐步入  
林藪雲深險徑黑石亂湍水吼尋源行漸遠茅屋

前如帚老烹茶味苦野啄琴形醜叟云司馬僂學  
道此居久屋東大磐石碁畫今尚有古木庇覆之  
清泉石根走因悲百年內汲汲成白首仙人固難  
值隱者亦可偶追惟恍如夢欲畫無好手



白石詩集卷之二

七言古詩

送王孟玉歸山陰

淮南雪落雲繞戍王郎鳴鞭獵狐兔  
尚君本是山陰人何不扁舟剡溪去  
人生樂事將無同知君此心如太空  
只今去踏龍尾道也似寒江蓑笠翁  
鑑湖一曲荷花浦君不歸來花有語  
舊宅應添竹我竿到家不覺秋如許  
十年雪裡看淮南聚米能作

宋番陽姜夔光章著

淮南山壽遙妙處須急吐政自不容修竹間人道  
長江無六月日光正射青蘆葉何以贈君濯炎熱  
雪即是詩：是雪

烏夜啼

老烏棲：飛且踈晨來枝上啄楮桃楮柰已空楮  
葉死猶啄枯枝覓虫蟻老烏賦尔何其貧未啼已  
被鄰公嗔吁嗟老烏不自知牆頭屋上紛成羣吳  
中貴遊重鸚鵡千金遠致能言語花底紅條鄭袖  
擎盤中碧果秦宮取天生靈物得人憐過者須來

鸚鵡遣老烏事：無三錄人間傳夜啼曲

余居苕溪上與白石洞天為鄰潘德久字  
予曰白石道人且以詩見畀其詞曰人間  
官爵似樗蒲來到枯松亦大夫白石道人  
新拜踈斷無徽駁任稱呼予以長句報賦  
南山仙人何所食夜：山中煮白石世人喚作白  
石仙一生費箇不費錢仙人食罷腹便：七十二  
峰生肺肝真祖只在南山南我欲從之不憚遠無  
方煮石何由軟佳名錫我何敢辭但愁自此長苦

飢囊中只有轉菴詩便當掬水三啜之

丁巳七月望湖上書事

白天碎：如拆綿黑天昧：如陳玄白黑破處青  
天出海月飛來光尚濕是月太史奏月蝕三家各  
自矜美術或云七分或食既或云食盡不在夕上  
令御史登吳山下視海門監月出年來歷失無人  
修三家之說誰為優乍如破鏡光炯：漸若小兒  
初食餅時方下令嚴禁銅破鏡何為來海東天邊  
有餅不可食聞說飢民滿淮北是鏡是餅且勿論  
須臾還我黃金盆金盆當空四山靜平波倒浸雲  
天影下連八表共此光上接銀河通一冷御史歸  
家太史眠人間不聞鐘鼓傳白石道人呼釣船一  
瓢欲酌湖中天荷葉擺頭君睡去西風急送敲窓  
句

送陳敬甫

十年所聞溢吾耳去年誦君書一紙古人三語得  
奇士况此磊落數百字相逢千岩萬壑裡有客如  
君請先事才高自古人所忌論高不信反驚世好

詩取客如券契我無三者獨至是如君之貧不可  
避如君之貧不可避呼舟徑度寒潮去

生雲軒

在山長與雲同齋出山憶雲：不來千金買得太  
湖石數峰相對寒崔嵬朝來忽覺青苔濕黶黶如  
炊石間出白雲何處不相逢却恠年：枉相憶王  
郎管中橫一丘在山出山雲與遊更呼白石老居  
士來倚雲根吟七字

送項平甫倅池陽

項君散名天宇窄與君俱是荆湖客向來相聞不  
相值長安城中乃相識論文要得文中天却與學  
步終不然如君筆墨與性合妙處特過蘇李前我  
如切：秋虫語自謂平生用心苦神凝或與元氣  
接屢舉似君：亦許西湖一曲古牆陰清坐論詩  
夜向深見謂人間有公等不知來者不如今乾坤  
雖大知者少君不見古人拙處今人巧我徂山林  
口挂壁如君合故狂瀾倒石渠春水綠決：閣下  
無人白日長萬里江湖入歸夢子雲不願校書郎

九華山色梅根渡半日風帆即秋浦六條察吏安  
用許幸有干岩作詩侶

書乞米帖後

銀鈎鐵畫太師字從人乞米亦可憐五倉空虛胃  
神哭竟日悄：無炊烟仙人留書說服氣道士辟  
穀期引年人生不食浪自苦獨不見子桑鼓琴十  
日雨

契丹歌

契丹家住雲沙中耆車如水馬若龍春來草色一  
萬物為藥牡丹相間紅大胡牽車小胡舞彈胡琵琶  
調胡女一春浪蕩不歸家自有穹廬障風雨平  
沙軟草天鷲肥胡兒千騎曉打圍阜旂低昂圍漸  
急驚作羊角凌空飛海東健鶻如許講上風生看  
看一舉萬里追奔未可知劃見伶：落毛羽平章  
俊味天下無年：海上驅群胡一鷲先得金百兩  
天使去送賢主廬天鷲之飛鐵為翼射生小兒空  
看得腹中驚怪有新薑元是江南徑宿食

禽言如曰哥：

君不見苔溪西南石鼓山鳥如鸚鵡啼其間一人  
相傳是阿弟千呼萬喚去復還身為獨雁失儔侶  
所愧鵲鴿圖急難繞林良：訴明月夜闌月落散  
漸咽天地闊遠兄不聞蒼厓下淚山竹裂豈無鴉  
舅與鵲姑人各有心非友于陟岡四顧空款款君  
不見江南望夫誰家子登山化石不得語

次韵誠齋送僕往見石湖長句

客來讀賦作雌蜺平生未聞衡說詩省中詩人官事  
了狎鷗入夢心無机韵高若：懸清月鏗鏘妙語春  
冰裂一自長安識子雲三嘆郢中無白雪范公蕭  
爽思出塵有客如此渠不貧堂：五字作城守平  
章幼敵君在口二公句法妙萬夫西來囊中藏魯  
瑛只今擊節烏棲曲不愧當年賀鑑湖



白石詩集卷之三

五言律詩

悼石湖三首

身退詩仍健官高病已侵  
江山平日眼花烏暮年  
心九轉終無助三高竟歆  
尋尚留中墊角 有  
知音

未作龍蛇夢驚湖露電身  
百年無此老千首屬何  
人安得公長健那知事轉  
新酸風憂國淚高塚卧

麒麟

未定情鍾痛何堪更悼亡遺書知伏枕未吊只空  
堂雪裡評詩句梅邊按樂章沈思酒杯落天濶意  
茫：

題華亭錢參園池

花裡藏仙宅簾邊駐客舟浦涵滄海潤雲接洞庭  
秋草木山：秀闌千處：幽機雲韜世業暇日此  
夷猶

同朴翁登卧龍山

龍尾回平野蒼牙出翠微望山憐綠遠坐樹覺春  
歸艸合平吳路鷗忘伯越機午涼松影亂白羽對  
禪衣

坐上和約齋

句入冰輪冷愁因玉宇開可無如此客猶恨不能  
杯好句長城立寒鴉結陣來篋篋莫傳手拚却斷  
腸回

出北關

吳兒臨水宅四面見行舟蒲葉侵鵝項楊枝蘸馬

頭年：人去國夜：月窺樓傳語城中容功名半  
是愁

答沈器之

江漢乘流客乾坤不繫舟玉琴虛素月金劍落清  
秋野鹿知隨草飢鷹故上鞬風流大堤曲一唱使  
人愁

涉遠身良苦登高望歎迷試吟青玉案不是白銅  
鞮露下秋蟲怨風高北馬嘶槎頭有新味人在太  
湖西

菖蒲

岳麓溪毛秀湘濱玉水香靈苗憐勁直達節著芬  
芳豈謂盤盂小而忘臭味長拳小并勺水所至未  
能量

范大叅入覲頗愛鄙作以詩謝之

問句石湖老如將日拍標枯中說滋味高處或虛  
驕頗喜唐音近寧論漢道遙改教今在耳萬樂聽  
簫韶

小孫納婦

慶事集朋親  
孫枝喜氣新  
敲雲停碧落  
舞雪眩青  
春暖日花  
君子清樽酒  
聖人一春行  
樂地不負  
牡丹辰

和王秘書遊水樂洞

自是瀛洲客  
還因野趣來  
解衣吟寂寞  
携酒上崔嵬  
石洞山  
秀梔花  
開只應  
岩下水  
相送上  
船回

白石詩集卷之四

宋番陽姜夔克章著

七言律詩

送朝天續集歸誠齋時在金陵

翰墨場中老斲輪真能一筆掃千軍年：花月無  
閒日處：山川怕見君箭在的中非爾力風行水  
上自成文先生只可三千首回首江東日暮雲

張平甫哀挽

將軍家世出臞儒合上青雲作計踈吳下定成花

未種湖邊地  
吉州新鋤空  
嗟過隙  
催人世  
賴有提孩讀  
父書  
他日石羊芳草路  
弟兄來此一沾福

寄上張參政

姑蘇臺下梅花樽  
應為調羹故  
早聞燕寢休  
講香霧重  
駕行却望  
衮衣來前時  
甲第仍垂柳  
今度沙隄已種槐  
應念無枝夜飛鶴  
月寒風勁羽毛摧

京口留別張思順

伯勞飛燕若為忙  
還憶東齋夜共床  
別後無書非弃我  
春前會面却<sup>也</sup>連宵  
為說<sup>編</sup>經憂患異日相逢

各老蒼更歎少留天  
不許曉風吹艇入垂楊

次朴翁遊蘭亭韻

亞字橋亭面  
風六人同坐  
樹陰中  
松交歸路如  
留客石磯流  
杯故惱公  
山色最憐  
秦望綠  
野花只作晉時紅  
夕陽啼鳥人將散  
俯仰興懷自昔同

次韻胡仲方因楊伯子見寄

此去廬陵定幾程  
向來筇杖未經行  
懸知征棹雲邊集  
大有吟情雪裡生  
楚渡食萍應甚美  
舜祠吹玉直能清  
二君即日青冥上  
惟我春山帶雨耕

賀張省翁參政

太乙圖書客屢談已知上相出淮南銀臺日月非  
虛過金鼎功名得細參從以與人為雨露應憐有  
客卧雲嵐明朝起為蒼生賀旋著藤冠紫竹簪

陳君玉以小集見歸用余還誠齋朝天續  
集韻作七字獲報既

筆陣無功汗左輪而今老去不能軍水邊白鳥閒  
於我窓外梅花疑是君欲向江湖行此語可無朋  
友託斯文新篇大是相料理因憶西山楊子雲

寄田郎

楚三田郎六火奇少年風味我曾知春城寒食誰  
相伴夜月梨花有所思剪燭屢呼金鑿落倚牕閑  
品玉參差含情不礙逢人說鸚鵡能歌自作詞

送王德和提舉淮東

京塵吹帽汗淋衣相見頻年只道歸省裡移文那  
得了家邊持節未為非煮乾碧海知誰用割盡黃  
雲尚告飢可得不為根本計秋風還是鴈南飛

寄時父

遲君日，數歸程。到得君歸我已行。一路好山思  
共看。半年有酒不同傾。吾儕正坐清貧累。各自而  
今白髮生。人物眇然。須強飯。天工應不負才名。

送李萬頃

猛相思裡得君來。正喜歡時却便回。別路恐無青  
柳折。到家應有小桃開。起居五馬兼堂上。問信千  
岩及阿灰。兒女癡頑。夫婦健漂零。何日共尊壘。

次韻千岩雜謔

中散平生七不堪。鳳塵時伴燕談。道士有神傳

火素。故人無字入雲藍。雨涼竹葉宜三酌。日落荷  
花倚半酣。極欲扁舟南蕩去。冷鷗輕燕畧相諳。

寄上鄭郎中

梅根東望九華雲。中有風流衣繡人。名下一生勞  
夢想。尊前數語倍情親。節旄在道催歸漢。花鳥留  
君且作春。見說祥雲扶時雨。故園松菊正精神。

送左真州還長沙

吳兒牽挽醉尊鱸。今日西歸略自如。別路冷雲隨  
驛馬。望鄉喬木記吾廬。湘中花月偏憐酒。淮左兒



童侍擁車凡我舊遊君更歷橘州相見訝無書

乍涼寄朴翁

前日松間步屣歸更將荷葉障秋暉如今城裡拋  
團扇應是山中試袂衣水有秋容蓮漸少樹含涼  
氣鳥慵飛炎天既懶趨城市從此尤須戀翠微

呈方叔

聾牙落魄一閑官職事何曾見一斑不是論松須  
說劍若非尋壑即觀山閒看落葉隨風去冷笑奔  
雲送雨還更有荆岩揚處士伴渠痴坐老花間

夏日奉天台祿

青天揮箠臥藤床翠袖携壺過酒漿蝟腹出波烹  
芟實高蹄和露擘蓮房相呼時入鷄豚社獨坐曾  
無鴈鷺行便是赤城真隱吏不將劉阮更相將

冬夜不寐

宵柝迢：警睡魔靜思甘分老林坡忍飢但有穉  
康嬾扣角曾無寧戚歌不起妄心思世事只將閒  
意養天和時人休說長生術學著長生事轉多

閒詠

虛糜廩祿飲醇醪不押文書不坐曹檢點園花為  
日課哀尋詩艸記年勞仍將書冊供慵臥時喚杯  
盤佐老饕感激大恩何以報惟祈聖壽與天高

賀暄

不是羲和德澤流寒鄉何處覓溫柔絕憐天上紅  
綿襖大勝人間紫綺裘旋欲胡床隨影轉更携書  
卷與閒謀天和妙處知誰會歆歆君却自羞

和陸放翁見寄

遙知三徑長荒苔解組東歸亦快哉津岸紛々群

吏去船頭哀々好山來平時佳客應相過勝日清  
尊想屢開若許詩篇數還往直須追挽古風回

和放翁

午庭風雨撼高槐一洗城頭十丈埃老子坐間尋  
句好故人門外寄詩來勁鋒久服穿楊妙鈍思深  
慙擊琫催清珮左符君未可安聽吟思發春雷

寄汪尚書

五十年間歎濶疎相忘兩地復江湖書來筆底驚  
強健詩去吟邊想步趨好對青山看歌舞莫嫌紅



粉笑顏鬢鳳毛已有哦松韻尚記金華舊範模

白石詩集卷之五

五言絕句

明妃

明妃未嫁時滿宮妬娥眉一朝辭玉陛人人淚

垂

年年心隨鴈日日穹廬中遙見沙上月忽憶建章宮

身同漢使來不同漢使歸雖為胡中婦只著漢家

衣

古樂府

裁衣贈所歡曲領再三安  
歡出無人試閨中自著  
看

甚欲逐卽行畏人笑無媒  
日日東風起西家桃李  
開

令我歌一曲曲終卽見留  
萬一不當意翻作平生  
羞

與和甫

枯槎啁乾鵲交臂失夫君  
奈此一尊酒凭高空水

雲

東堂聯句

金風生夜深吹我蕭蕭髮  
起折丹桂枝驚落花上

月趙雍和  
仲白石

七言絕句

牛渚

牛渚磯邊渺：秋笛散吹月下中  
流西風不識張  
京兆畫得蛾眉如許愁

武康正宅同朴翁詠牽牛

青花綠葉上踈籬別有長條竹尾垂老覺淡妝差  
有味滿身秋露立多時

朴公悼牽牛甚奇余亦作

不見青：繞竹生西風籬落抱枯藤道人一任空  
花過愁殺山陰覓句僧

過德清

木末誰家縹緲亭盡堂臨水更虛明經過此處無  
相識塔下秋雲為我生

溪上佳人看客舟：中行客思悠：湮波漸遠橋

東去猶見闌干一點愁

過湘陰寄千岩

渺：臨風思美人荻花楓葉帶離聲夜深吹笛移  
船去三十六灣秋月明

鴈圖

萬里晴沙夕照西此心唯有斷雲知年：數盡秋  
風字想見江南搖落時

除夜自石湖歸苕溪

細草穿沙雪半銷  
吳宮烟冷水迢迢  
梅花竹裡無人見  
一夜吹香過石橋

美人臺上昔歡娛  
今日空臺望五湖  
殘雪未融青草死  
苦無麋鹿過姑蘇

黃帽傳呼睡不成  
投篙細數浪流冰  
分明舊泊江南岬  
舟尾春風颭客燈

千門列炬散林鴉  
兒女相思未到家  
應是不眠非守歲  
小牕春色入燈花

三生定是隨陸天  
隨只向吳松作客歸  
已拚新年

舟上過倩人和雪洗征衣

沙尾風回一棹寒  
椒花今夕不登盤  
百年草色都如此  
自琢春詞剪燭看

笠澤茫茫雁影微  
玉峰重疊護雲衣  
長橋寂寞春寒夜  
只有詩人一舸歸

桑間篝火却宜蚕  
風土相傳我未諳  
但得明年少行役  
只裁白紵作春衫

小小知名翰墨場  
十年心事只淒涼  
舊時曾作梅花賦  
研墨於今亦自香

環玦隨波冷未銷  
古苔留雪臥牆腰  
誰家玉笛吹春怨  
看見鷺黃上柳條

臨安旅次答蘇虞叟

垂楊風雨小樓寒  
宋玉秋詞不忍看  
萬里青山無處隱  
可憐投老客長安

姑蘇懷古

夜暗歸雲繞舵牙  
江涵星影鷺眠沙  
行人悵望蘓臺柳  
曾與吳王掃落花

次韵德久

籬落青苔花倒垂  
避人黃鳥雨中飛  
西郊寂寞無車馬  
時有溪童賣菜歸

次石湖書扇韵

橋西一曲水通村  
岸隔浮萍綠有痕  
家住石湖人不到  
藕花多處別開門

竹友為徐南卿

髮已星鬢帶已寬  
徐卿猶是客長安  
家山竹好無由看  
漫種庭前一兩竿

世路蒼茫總是愁  
暮年須得小優游  
如今漸覺知



心少騰種青：伴白頭

壽朴翁

與師同月不同年歸墨歸儒各自緣想得山中無  
壽酒但携茶到菊花前

湖上寓居雜咏

荷葉披：一浦涼青蘆葉：夜吟高平生最識江  
湖味聽得秋聲憶故鄉  
湖上風恬月淡時卧看雲影入玻璃輕舟忽向窓  
前過搖動青蘆一兩枝

秋風低結亂山愁千頃銀波礙不流隄畔畫船隄  
上馬綠揚風裡兩悠：

處：虛堂望眼寬荷花荷葉過闌干遊人去後無  
簫鼓白水青山生晚寒

輦路垂楊兩行栽苑門秋水欲平階朝：南望宮  
雲起白鳥一隻山下來

微波衝得綠萍開數點青：黏石階綠葑自來還  
自去來時須載白鷗來

布衣何用揖王公歸向蘆根濯軟紅自覺此心無

一事小魚跳出綠萍中

囊空萬字總空言  
露滴桐枝欲斷弦  
時事悠々吾亦懶  
卧看秋水浸山烟

苑牆曲々柳冥々  
人靜山空見一燈  
荷葉似雲香不斷  
小船搖曳入西陵

處士風流不並時  
移家相近若依々  
夜涼一舸孤山下  
林黑草深螢火飛

卧榻看山綠漲天  
角門長泊釣魚船  
而今漸欲拋塵事  
未了菟裘一悵然

釣窓不忍見南山  
下有三雉骨未寒  
惆悵古今同此味  
二陵風雨晉師還

柳下軒窓枕水開  
畫船忽載故人来  
來與君同過西城路  
却拍烟波獨自回  
指點移舟善柳堤  
美人相顧復相携  
上橋更覺秋香重  
花在西陵小苑西

平甫見招不欲往

老去無心聽管絃  
病來杯酒不相便  
人生難得秋前雨  
乞我虛堂自在眠

樓閣萬重秋雨裡峰巒四合暮潮還鳳城今夕涼  
如水多少人家試管絃

三高詞

越國伯來頭已白洛京歸後夢猶驚沈思只羨天  
隨子蓑笠寒江過一生

過桐廬

橫看山色仰看雲十幅風帆不藉人記取合江江  
畔樹他年此處好垂綸

過垂虹

自侬新詞韻最嬌小红低唱我吹簫曲終過盡松  
陵過路回首烟波十四橋

訪費上人

稻叢茁々欲齊肩楊柳傲々不蔽蟬忽憶石頭橋  
下路槿花斜壓釣魚船

登烏石寺觀張魏公劉安成岳武穆留題

劉云侍兒意真奉命題記

諸老凋零極可哀尚留名字壓崔嵬劉郎可是疎  
文墨幾點胭脂汗綠苔

項里

項里項王之里也在山陰西南二十餘里地  
多楊梅苔梅皆妙天下王性之賦項里楊梅  
云只今枝頭萬顆紅猶似咸陽三月火予近  
得苔梅一株古恠特甚為作七言

舊國婆娑幾樹梅將軍逐鹿未歸來江東父老空  
相憶枝上年々長綠苔

雪中六解

塞草汀雲護玉鞍連天花落路漫漫如今却憶當

時健下馬題詩不怕寒

黃鶴磯邊晚渡時柳花風急片帆飛一散長笛魚  
龍舞白浪如山不肯歸

萬馬行空轉屋簷高寒屢索酒杯添故人家住吳  
山上借得西湖自捲簾

曾泛扁舟訪石湖恍然坐我范寬圖天寒遠挂一  
行雁三十六峰生玉壺

萬壑千巖一樣寒城中別有玉龍蟠舊人乘興扁  
舟處今日詩仙戴笠看

沈香火裡笙簧合，煖玉鞦韆雉兔空。  
辦得煎茶有，驕色先生只合作詩窮。

越中士女春遊

秦山越樹兩依依，閑倚闌干看落暉。  
楊柳梢頭春又暗，玉簫聲裡夜遊歸。

送范仲訥往合肥三首

壯志只便鞍馬上，客夢長在江淮間。  
誰能辛苦運河裡，夜與商人爭往還。  
我家曾住赤欄橋，鄰里相過不寂寥。  
君若到時秋

已半西風門巷柳蕭蕭。

小簾燈火屢題詩，回首青山失後期。  
未老劉郎定重到，煩君說與故人知。

下孤城

人家多在竹籬中，楊柳疎疎尚帶風。  
記得下孤城，下路白雲依舊雨三峰。

平甫放三十六鷗於吳松，余不及與盟

橋下松陵浪橫來，遲不與白鷗盟。  
知君久對青山立，飛盡蘼花好句成。

蕭山

歸心已逐晚雲輕，又見越中長短亭。  
十里水邊山下路，桃花無救麥青。

戊午春帖子

晴窗日：擬離虫惆悵明時不易逢，  
二十五絃人不識淡黃楊柳舞春風。

偶題

阿八宮中酒未醒，天風吹髮夜冷冷。  
歸來只怕扶桑晚，赤脚橫騎太一鯨。

陳日華侍兒讀書

絳句尋章久未休，花房日晏不梳頭。  
誰教即主能多事，乞與冥：千古愁。

女郎山

不見郢中能賦客，可憐負此女郎山。  
冰魂寂寞無歸處，獨宿鴛鴦沙水寒。

釣雪亭

闌干風冷雪漫漫，惆悵無人把釣竿。  
時有官船橋畔過，白鷗飛去落前灘。

綠萼梅

黃雲承靨知何處，  
招得冰魂付北枝。  
金谷樓高愁欲墮，  
斷腸誰把玉龍吹。

次韵武伯

楊柳風微約暮寒，  
野禽容與只波間。  
道人心性如天馬，  
可愛青絲十二閑。

觀燈口號

世間形象盡成燈，  
烘火旋紗巧思生。  
列肆又多看不遍，  
行人一一把燈行。

市樓歌吹太喧譁，  
燈若連珠照萬家。  
太守令嚴君

莫舞遊人空帶玉梅花

遊人總戴孟家蟬，  
爭託星球萬眼圓。  
闌裡傳呼大

去後車多少，  
盡<sup>官</sup>蟬娟。

花帽籠頭幾歲兒，  
女兒學著內人衣。  
燈前月下無

歸路不到天明亦不歸

好燈湏買不論錢，  
別有琉璃價百千。  
都下貴人多

預賞買時長在一陽前

珠絡琉璃到地垂，  
鳳頭銜帶玉交枝。  
君王不賞無

人進天竺堂深夜雨時

紛：鐵馬小回旋幻出曹公大戰年若使英雄知  
事不教兒女戲燈前

貴客鈞簾看御街市中珍品一時來簾前花架無  
行路不得金錢不肯回

修內司人編戲鼓輦宮營裡獨燒燈春風到處皆  
君賜金柳絲：滿鳳城

正好嬉遊天作魔翠裙無奈雨沾何御街暗裡無  
燈火處：但聞樓上歌

陪張平甫遊禹廟

鏡裏山林綠到天春風只在禹祠前一聲何處提  
壺鳥猛省紅塵二十年

燈詞

南陌東城盡舞兒畫金刺繡滿羅衣也知愛惜春  
遊夜舞落銀蟾不肯歸

燈已闌珊月氣寒舞兒徃徃夜深還只因不盡婆  
婆意更向階心弄影看

沙河雲合無行處惆悵來遊路已迷却入靜坊燈



火室門門相似列蛾眉  
遊人歸後天街靜坊陌人家未閉門簾裏垂燈照  
尊俎坐中嬉笑覺春溫

春詞

六軍文武浩如雲花簇頭冠樣樣新惟有至尊渾  
不戴盡將春色賜羣臣  
萬數簪花滿御街聖人先自景靈回不知後面花  
多少但見紅雲冉冉來

同朴翁過淨林廣福院

四人松下共盤桓筆硯花壺石上安今日興懷同  
此味老仙留字在孱顏

三高祠

不貪名爵伐功勞勇退深虞後患遭甫里閒居畊  
釣樂范張高處陸猶高

於越亭

松尾颼颼石浪寒胡啼蕃曲轉聲酸人間無此春  
風手應是江妃夜夜彈

寄俞子

此郎都無子弟氣夜對黃妳籠青燈君今落腳墮  
鴛外欲往從之歎未能

郎罷才名今白髮佐州亦復坐窮邊甚欲出予相  
料理東南風高難寄牋

六言

金神夜獵圖

夜半金神羽獵奔走山川百靈雲氣旂旗來下颯  
然已入青冥

後宮嬋娟玉女自鞚八尺飛龍兩兩鳴鞭爭導綠

雲斜墜春風

次韻鴛鴦梅

晴日小溪沙暖春夢憐渠頸交只怕笛聲驚散費  
人月咏風嘲

漠漠江南煙雨予飛似報初春折過女郎山下料  
應愁殺佳人

馬上值牧兒

馬背何如牛背短衣落日空山只應身歸盤谷未  
須名滿人間